

駱賓王文集

駱賓王文集

四部叢刊集部

駱賓王文集序

魯國郝雲卿

駱賓王婺州義烏人也年七歲能屬文高宗朝與盧
照隣楊炯王勃文詞齊名海內稱焉号爲四傑亦云
盧駱楊王四才子仕至侍御史後以天后即位頻貢
章疏諷諫因斯得罪貶授臨海丞文明中與嗣業於
廣陵共謀起義兵事旣不捷因致逃遁遂致文集悉
皆散失後中宗朝降勅搜訪賓王詩筆令雲卿集焉
所載者即當時之遺漏凡十卷此集並是家藏者亦
足傳諸好事

唐書列傳

駱賓王義烏人七歲能賦詩初爲道府屬嘗使自言所能賓王不荅歷武功主簿武后時數上疏言事下除臨海丞鞅鞅不得志棄官去徐敬業亂署賓王爲府屬爲敬業傳檄天下斥武后罪后讀但嘻笑至一杯之土未乾六尺之孤安在矍然曰誰爲之或以賓王對后曰宰相安得失此人敬業敗賓王亡命不知所之中宗詔求其文得數百篇他日崔融與張說評勃等曰勃文章宏放非常人所及烟照隣可以企之說曰不然盈川文如縣河酌之不竭優於盧而不

減王恥居後信然媿在前謙也開元中說與徐
堅論近世文章說曰李嶠崔融薛稷宋之問之
文如良金美玉無施不可富嘉謨如孤峯絕岸
壁立萬仞濃雲鬱與震雷俱發誠可畏也若施
於廊廟駭矣閭朝隱如麗服靚粧燕歌趙舞觀
者忘疲若類之風雅則罪人矣堅問今世柰何
說曰韓休之文如大羹元酒有典則薄滋味許
景先如豐肌膩理雖穠華可愛而乏風骨張九
齡如輕縑素練實濟時用而窘邊幅王翰如瓊
栝玉笋雖爛然可珍而多玷缺堅謂篤論云

列傳畢

駱賓王文集卷第一

賦頌

螢火賦

蕩子從軍賦

靈泉頌

螢火賦

并序

余猥以明時久遭幽繫見一葉之已落知四運
之將終悽然客之爲心庠悲哉秋之爲氣也光
陰無幾時事如何太塊是勞生之機小智非周
身之防嗟庠綈袍匪舊白首如新誰明公治之
非孰辨臧倉之愬是用中宵而作達旦不瞑覩
茲流螢之自明哀此覆盆之難照夫類同而心

異者龍蹲歸而宋樹伐質殊而聲合者魚形出而吳石鳴苟有會於精靈夫何患於異類況乘時而變合氣而生雖造化之不殊亦昆蟲之一物應節不憊信也與物不競仁也逢昏不昧智也避日不明義也臨危不懼勇也事有公情而動興因物而多懷感而賦之聊以自廣云爾

伊玄功之播氣有丹鳥之賦象順陰陽而亭毒資變化而含養每寒潛而暑至若知來而藏往既發揮以外融亦含光而內朗若夫小暑南收大火西流林塘改夏雲物迎秋忽凌虛而赴遠乍排叢而出幽均火齊之宵映如夜光之暗授

逝將歸而未返忽欲去而中留入槐榆而焰發
若改燧而環周繞堂皇而影泛疑秉燭以嬉遊
點綴懸珠之網隱映落星之樓乍滅乍興或聚
或散居無定所習無常翫曳影周流飄光零亂
泛艷虬池沼徘徊虬林岸狀大井之沉熒似明
珠之出漢值衝飈之不烈逢淫雨而逾煥炤灼
兮若湛盧之夜飛灼爍兮像招搖之夕爛與庭
燎而相炫然重陰於已昏共爝火而齊息避太
陽於始旦爾其光不周物明足自資偶仙鼠而
伺夜對飛蛾之赴嬉類君子之有道入暗室而
不欺同至人之無迹懷明義以應時處幽不昧

照斯晦隨隱顯而動息候昏明而進退委性命兮幽玄任物理兮推遷化腐木而含彩集枯草而藏煙不食熱以苟進每和光而曲全豈如鎔金而自爍寧學膏火之相煎陋蟬蛭之習蛻怵螻蟻之慕羶匪傷蜉蝣之夕不羨龜鶴之年槍榆飛而控地搏扶起而垂天雖小大之殊品豈逍遙之異筌夫何化之斯化無使然而自然若乃有來斯通無往不至排朱門而獨遠昇青雲而自致匪偷光於鄰壁寧假輝於陽燧終狗已以致能靡因人而成事物有感而情動迹或均而心異響必應之於同聲道固求之於同類

始未明於趨捨庸詎識其指意子尚不知魚之
爲樂吾又安知螢之利高明兮有齕遷變兮無
窮牛哀條而化虎羽泉忽兮生熊血三年而藏
碧菟一變而成虹知戰場之有燐悟冤獄之爲
蟲彼翺飛之質弱尚矯翼之凌空何微生之多
躓獨宛頸以觸龍巖辟光之照廡同劍影之理
豐覬道迷而可復庶幽鑒而或通覽光華而自
照顧形影以相弔感秋夕以殷憂難宵行以熠
燿熠燿飛兮絕復連殷憂積兮明旦煎見流光
之不息愴驚魂之屢遷如過隙之已來同奔電
兮忽焉儻餘光之可照庶寒灰之重然

蕩子從軍賦

胡兵十萬起妖氛漢騎三千掃障雲隱隱地中
鳴戰鼓迢迢天上出將軍邊沙遠離風塵氣塞
草長萎霜露文蕩子辛苦十年行回首關山萬
里情遠天橫劍氣邊地聚笳聲鏃騎朝常警銅
焦夜不鳴抗左賢而列陣比右校以䟽營滄浪
積凍連蒲海雨雪凝寒遍柳城若乃地分玄微
路指青波邊城暖氣從來少關塞寒雲本自多
嚴風慄慄將軍樹苦霧蒼蒼太史河旣拔距而
從軍且揚麾而挑戰征旆凌沙漠戰衣犯霜霰
樓船一舉爭沸騰烽火四連相隱見戈文耿耿

懸落星馬足騷騷擁飛電終取俊而先鳴豈論
功而後殿征夫行樂踐榆溪倡婦嘶怨坐空閨
靡蕪舊曲終難贈芍藥新詩豈易題也前怯對
鴛鴦伴庭際羞看桃李蹊花有情而獨笑鳥無
情而恒啼蕩子別來年月久賤妾空閨更難守
鳳凰樓上罷吹簫鸚鵡林中臨勸酒同道書來
一鴈飛此時纖怨下鳴機裁鴛鴦帖夜被薰麝染
椿屏風宛轉蓮花帳牕月玲瓏翡翠帷箇日新
粧如復罷祗應含笑待君歸

靈泉頌并序 三首

聞夫玄功幽贊靈心以有德是親至道冥符篤

行以通仁爲本若乃天經地義色養叶於因心
夏清冬溫愛敬弘於錫類下建六幽之奧上洞
三光之精不有至誠孰云斯感有廣平宋思禮
字過庭皇朝永州刺史昉之嫡孫戶部員外
之長子幼丁偏罰早喪慈親永懷鞠養之恩長
增思慕之痛弱不好弄長而能賢趨庭聞詩禮
之風永宗勗曾閔之行事後母徐以至孝聞北
面興悲泣高堂而咎已東遊下位徵祿以逮親
調露二年來佐百里俯就微班之列將由返哺
之情敬立身其若斯於從政庠何遠時歲亢旱
金石行銷環近川源始將煙絕濬井皆爲湯谷

通波盡化汚池太夫人在遲暮之年有溫勞之疾非濫聚不可以適口非源泉不可以蠲痼色養既虧憂惶靡訴俄而廳階之下忽清泉而自生因疏導其源遂流注不竭味甘若醴氣冷如冰此邑城控剡山地連禹穴基址多石岡阜無津爰自興建已來曾微穿汲之利非精誠貫於有道純志浹於無私孰能治冥貺以通幽導靈泉而致養者也晉漢臣忠烈窮井飛於一言姜婦孝思潛波移於七里靜惟陳迹彼亦何人蕭縣尉柳晃耿介之士也道外則金蘭若膠漆清異則軒冕猶埃塵片善可嘉朝聞甘於夕死一

諾猶重黃金賤於白珪以爲執友素交豈祿利
輕肥之謂也賞音達禮非鐘鼓玉帛之云虋所
恥者歿而無稱所貴者存虋不朽徒懷美志未
遇良材某出贅荒隅途經勝壤三秋客恨長懷
宋玉之悲一面交歡暫雪栢潭之涕覩斯水之
清泚感若人之精誠見賢思齊仰珪璋而有地
揮毫興頌鏤琬琰之無慙乃作頌曰

粵若稽古厥初生民其誰不孝獨我難倫義不
存道仁不遺親愛敬盡力孝悌通神

頌我恩極因心感至冥契動天甘泉湧地冷冷
無竭蒸蒸不匱曾是我思永錫爾類

爰有芳人景行勞塵事諧則感通洽斯親孝爲
禮主名是實賓儻斯文之不墜知盛德之有鄰

駱賓王文集卷第一